



## ILANZ/GLION

# Revista frestga e moderna

Ella vischnaunca Ilanz/Glion dat ei dapi 12 onns in organ da publicaziuns. Quella enconuscheva la populaziun entochen uss cul num «Porta Cotschna». Cuort avon Nadal ei l'emprema ediziun dil magazin rinfrestgau cumparius. Quel ha il num «Einmal13».

Gl'onn 2011 ha gl'antierur marcau da Glion introduciu in instrument publicistic niev. Sereferend sin in dils edificis historics han ins dau agl organ il num «Porta Cotschna». Duront 12 onns ei quella cumparada regularmein ed ha rapportau da quei e da tschei. Cun ina ediziun da mintgamai rodund 2500 exemplars han ins reparti la «gasettina» ellas casadas ed allas habitaziuns secundaras. La Porta Cotschna ha surviu a comunicaziun, coesiun ed informaziun, avon, duront e suenter la fusiun 2014 dil marcau da Glion cun 12 vischnauncas.

### Scaffir identitad

Elements grafics, fotografias, reportaschas dallas fracziuns, intervestas e texts d'occurrências e mutaziuns en politica e societad han dau accent alla revista. Onn vargau ha la suprastanza communal decidu da surluvrar il concept e la grafica.


Avon Nadal ha la vischnaunca saviu tarmetter ellas casadas la revista «nova». Quella consista da 16 paginas e dat en egl gl'emprem cul niev num. Il tetel dil frontispezi «Einmal(ig)» ei screts aschia ch'ils dus bustabs «ig» fuorman la cefra 13. «Quella duei scaffir identitad», scriva la responsabla per la comunicaziun dad Ilanz/Glion, *Debora Lutz*. Vitier vegn ch'il «ig» ei supplementarmein las inizialas per Ilanz Glion.

Il magazin rinfrestgau e modernisau vegni a cumparer quater gadas ad onn, san ins leger ella «Einmal13». Il sottetel en romontsch ei dil reminent titulus «Il magazin dalla vischnaunca Ilanz/Glion». Debora Lutz ei responsabla pil cuntegn digl organ publicistic. Che l'emprema ediziun ha paucs texts romontschs, eis ella cunscenta ed igl ei previu d'includer e risguardar meglier la bilinguitad ellas proximas ediziuns.

### Intervista cun sora **Annemarie Müller**

Enamiez la «Einmalig13», sin ina pagina dubla, san ins leger ina intervesta culla priura generala dalla claustra da Glion, sora *Annemarie Müller*. Vitier rapporta il magazin, denter auter, dallas sfidas dalla

scola, d'ina midada da generaziun en ina garascha, dalla promoziun da cultura sco era dalla viseta dil parlament communal a Berna. (fmr/abc)



La nova revista «Einmalig13» dad Ilanz/Glion. FOTO MAD